

SANDRA

A KIBRA TUR RECORD DEN FARANDULA!!!



Miss Thailand, Miss Aruba, Miss Venezuela (Miss Mundo) akinan ta pose pa un potret.

Nos bella Sandra ta back riba su dushi isla Aruba despues di casi tres siman representando Aruba dignamente pa e certamen Miss Mundo. Durante e tres siman Sandra a bishita Amsterdam, Londres, South Africa, New York y Atlanta Georgia caminda e certamen grandi a finalisa.

Tabata un experiencia hopi grandi y inolvidable pa bella Sandra. Sandra no tabata tin e suerte pa finalisa den e dieznan, apesar cu hopi hende na Aruba cu tabata siguiendo e transmision vivo y directo, a kere sigur cu Sandra lo bay clasifica entre e dieznan, debi cu constantemente e tabata aparece riba pantalla.

Na yegada di Sandra na Aruba DEN AMBIENTE a

nota cu e tabata muestra hopi cansa. Pero asina mes e no a tuma ningun dia di descanso. Sandra a cuminsa canta pa su banda Papito y su Doble Sabor, cu a sinti su falta hopi durante su ausencia. For di 9or di anochi bispo di aña nobo el a cuminsa canta pa su banda durante un fiesta na Hyatt, y termine na Esso Club banda di 8or di mainta.

Akinan Sandra a bolbe demostra cu e tin amor pa farandula. Por bisa cu henter aña '91 Sandra tabata ocupa den farandula, a cera aña y habri aña den farandula. Durante Carnaval '91, e la participa pa Reina di Carnaval cual e la sali prome finalista. Despues e tabata tin por lo menos cuatro luna ocupa pa e certamen di Miss Aruba cual e la ser eligi pa repre-

senta Aruba pa Miss Mundo.

Pa representa su pais dignamente Sandra tabata haci viahenan constantemente pa Venezuela caminda e la haña algun curso di pasarela y maquillaje hunto cu e actual Miss Mundo Ninibeth Leal cu a bira su amiga intima. Tur esaki mientras tanto cu tur weekend e tabata canta pa su banda te den oranan di marduga, y tambe enseña y graba den e ultimo L.P. "Tia" di Papito y su Doble Sabor.

Pa e bella cantante aki no tabata suficiente pasobra e tabata tin un compromiso hopi serio cu e casa disquero Sono Rodven pa lansa un L.P., cual a resulta exitosamente clasificando entre e binti L.P. nan mas mihor na

Venezuela. Tambe e la duna un fantastico presentacion tanto aki na Aruba cu den studionan di Venevision pa e gigantesco programa di Sabado Sensacional.

Durante e actividadnan pa Miss Mundo Sandra a canta na dos ocasion pa e candidatanan y miembronan di comision tanto na South Africa y na Atlanta, demostrando su talento artistico. Na South Africa e comision organisador a mantene e lema di Miss Mundo "Beyesa cu proposito", na unda e la duna un bunita presentacion di moda cual fondo a bay pa muchanan di menos recurso.

Na Atlanta nan a hospeda den e luhoso Hotel Nikko, y su "roommaid" tabata Miss Argentina srta. Marisela Chazaretta cu porcierto ta mucha muher masha cariñoso mes. Sandra a graba e tema "I said, sing" hunto cu Miss Suecia Catherine Olssen, cual grabacion a ser usa durante estadia di e candidatanan como tema principal di nan actividadnan.

E comision a nota Sandra su talento como cantante y durante un dinner sorpresivamente a yame pa dilanti pa asina e canta e cancionnan Feliz Navidad y La Bamba, pa tur esnan presente y a ricibi un tremendo aplauso. Tambe nan a bishita e Main Station di Coca Cola y e stadion cu ta ser construi pa e weganan olimpico na '96.

Sandra a ricibi tres grato

noticia, e prome ta cu e la ser invita oficialmente pa ta presente durante celebracion di yegada di su amiga Miss Mundo Ninibeth Leal, cu despues di a ser eligi Miss Mundo a biaha pa Londres pa firma algun contractnan milionario. E di dos ta cu e organisadornan a goza su actuacionnan durante e certamen, y a contrate pa un actuacion durante e proximo fiesta especial pa Miss Mundo, Ninibeth Leal na Londres.

E di tres ta cu Sandra a ricibi un yamada di Miss Sweden Catherine Olsson cu e tin gana di bin bishita Sandra na Aruba, y cu e ta na Miami actualmente. Sandra a keda di haña un yamada mas pa asina e confirma su bishita na Aruba. Na South Africa Sandra a comparti un rato cu e muchanan den necesidad, na unda un anciana tin cu cushina pa 50 mucha. Sandra no por a domina su lagrima y a yora un rato den silencio. Sandra su mensahe pa aña '92 ta cu lo tin paz, amor, felicidad, union y cu cada persona por corda un momento riba nos Creador y pa dedica mas tempo na Dios. Na Aruba nos no mester bira materialista, evita violencia y siña comparti cu otro. Aruba sigur ta orgulloso di bella Sandra, maske e no a logra conquista e corona, pero si a logra hopi promocion valioso pa su dushi terra Aruba.



Aki por mira Miss Aruba Sandra Croes, hunto cu Miss Republica Dominicana, Miss Paraguay, Miss Venezuela (Miss Mundo), y Miss Brasil.